

Anochi ameno cu presentacion di buki "Buscando felicidad"

ORANJESTAD(AAN):

Den Biblioteca Nacional diahuebs anochi a tuma lugar presentacion die buki di escritor Herman Henep, **"Buscando Felicidad"**. E bunita di e anochi aki tabata cu e buki a ser presenta den un forma agradable caminda cu cada persona presente a goza di un anochi placentero. No tabata tin nada di **"tam tam"** cu ta haci e tipo di anochinan aki, **"un anochi stijf"**.

Ito Tromp cu tabata maestro di ceremonia a tene e audiencia bon ocupa cu su splicacionnan y anecdotan riba e autor y intercambia cu humor cu a haci e anochi agradable. Etty Toppenberg a anima e anochi cu su cancionnan, y e

biaha aki cancionnan cu a sali di su propio inspiracion riba aspectonan di bida y tradicionnan di nos isla, cu un recorrido di cada skina di nos isla, punto pa punto, combina cu canticanan infantil cu na mes momento ta canticanan cu hoi adulto awe ainda ta canta pa nan placer na diferente ocasion.

Drs. Pancho Geerman director di UNOCA a papia riba e **"dolornan"** cu tabata tin pa por a pone e buki riba mercado, y a referi na e titulo cu a **"busca felicidad"** te cu a haya esaki cu e presentacion. Ito a lesa parti di e buki, y tene e audiencia keto scuchando, y na final di esaki, el a laga tur hende cu gana di scucha mas, ora cu el a indica cu ta mihor

pa cumpra e buki pa lesa kico ta sigui. El a referi na e historia den e buki, apoyo grandi di señora Henep y yunan di e autor, e sacrificionan haci den nan bida, y manera Drs. Pancho Geerman a menciona, e sacrificionan pa a logra finalmente na presenta e buki. Na esaki el a agrega e ultimo frase den e buki cu ta bisa: **"No tin amor sin sacrificio"**.

Herman Henep mes a splica e audiencia cu e buki aki ta skirbi pa wordo usa tambe na schoolnan secundario. E no ta un buki diki, pasobra e sa cu na Aruba hopi hende no ta gusta lesa, principalmente si bukinan ta diki, pesey no a haci esaki un novela largo. E ta skirbi na un manera sim-



pel y agradable pa lesa.

"Mi a lesa parti di e buki ayera anochi, y a haya e historia di Diego y Lena fascinante, y ta recomenda tur hoben y nan mayornan pa lesa e buki aki cu ta ilustra problemanan real y sufrimento cu hobennan por pasa aden", redactor Juby Naar a comenta riba e buki ayera.

E prome dos edicionnan a wordo entrega na Astrid de Cuba di Biblioteca Nacional

y na Pancho Geerman di UNOCA, mientras cu a spera yegada di ministranan invita, pero ningun a haci acto di presencia e anochi aki local e invitadonan a lamenta.

E anochi a cera cu un brindis y cu Etty Toppenberg y Maybeline Arends Croes deleitando e invitadonan cu nan cancionnan di recuerdo na momento cu Sr. Herman Henep tabata firmando e prome edicionnan cumpra e anochi aki mes.

